



### **Nunatta Karsiata 2014-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassaattut siunnersuut.**

(Aningaasaqarnermut Aatsitassanullu Naalakkersuisoq)

Nunatta Karsiata naatsorsuutaasa aappassaaneerneranut Inuit Ataqatigiinniit uku immikkut oqaaseqarfigissavagut.

2014-imut naatsorsuutit 154 mill. Amigartoorput. Taamaalilluni Naalakkersuisut amigartooruteqarnissamik pilersaarutaasumiit 103 mill. annertunerulluni. Ilanngaassereerluni taarsigassarsisitsineq ilanngukkutsigit amigartoorutit 222 milliuniussapput. Amigartooruissamik naatsorsuutigisamiit annerunera pissuteqarpoq aningaasat isertitassat amigaataanerat. Tamanna soorunami ernumanartorujorujussuuvoq. Isertitassatut naatsersuutaagaluit isertinneqannginneri assut ajornartorsiornermik tunngaveqarput. Naatsersuutit takutippaattaq ingerlatsineranut aningaasartuutigit qaffakkiartuutut, isertitallu annikilliarortut. 2012 – 2014 ingerlanerani isertitagut taamaallaat 4 %-imik qaffariarsimapput, ingerlatsineramullu aningaasartuutigit 8 %-imik qaffariarsimallutik. Nammineq inuttut aningaasaqarnerugaluarpas akuersaarneqanngilluinnassagaluarpas. Taamaattumik tamakkiisumik isiginninnermi Inuit Ataqatigiinniit kaammattuutigissavarput pisortat aningaasaataat ukiunut kingullernut sanilliullugu paarilluarnerusariaqarput.

Kukkunersiuineranut ataatsimiititaliap isumaliutissiissutaani Naalakkersuisut uparuarneqarput, missingersuusiortarneq pillugu inatsit malillugu ukiumut ataasiarluni Sanaartugassanut Iluarsartuussineramullu nalunaarut saqqummiunneqarsimasoq, aatsaat inatsisartut ataatsimiinnerani ullormi kingullerpaami. Kukkunersiuineranut ataatsimiititaliap isumaqatigaarput oqarmata Naalakkersuisut isumaliutissiissutikkut peqquneqarput aappassaaneerinninnermi nassuiaaqquullugit, suliat naammaginarsimanngimmata.

Siunnersortinik avataaniit annertoorujussuarmik atuisarneq Kukkunersiuinermik ataatsimiititaliamiit aamma uparuarneqarpoq aningaasartuuterujussuuartullu inissisimammat. Naalakkersuisunit naammaginartumik taamarsuaq atuisarneq nassuiarsinnaasimanngilaat. Tamanna naammaginangilluinnarpoq, naatsorsuutigarpullu nassuiaanneqarnissarput, siumullu isigisumik allannguisoqartariaqartoq.

Oqaaseqarfigerusupparputtaaq kukkunersiuineranut ataatsimiititaliap isumaliutissiissutaagut eqqaaneqartoq, aatsaallu naammassivittut taaneqarsinnasoq, tassaammat Naalakkersuisunut siulittaasuusimasup, ilaatigullu ilaqtumik, inuttullu aningaasartuutit allat, nunatta karsianit akilersitsisarsimani. Matumuuna naatsorsuutigilluinnarparput pisumik taamaattumik kingorna Nunarput nalaataqassanngisaannassasoq. Pisoq inuiaqatigiinnut akisusimaqaaq, qinersinermik allaat kinguneqarsimalluni. Tamanna imaannaanngitsorujussuuvoq.

Isumaliutissiissummi aammattaq annertoorujussuarmik allaaserineqarpoq Tusagassiivik Sermitsiaq / AG-mut aviisinut Naalakkersuisuusimasut, massakkullu Naalakkersuisut itigartitsinerat.

Oqaluttuaq takisooq naatsumik oqaaseqarfigissagaanni, Naalakkersuisut, aningaasanut inatsisip oqaasertarinngisai tunngavilersuutigalugit qinnuteqaat itigartissimavaat.

Isumaliutissiissummilu ataatsimiititaliap oqaatigaa: "*Siuliani allassimasuni takuneqarsinnaasutut pissutsit arlallit erseqqissilluarpaat aningaasat aningaasanut inatsimmi*

*immikkoortinneqartut Naalakkersuisut Tusagassiivik Sermitsiaq/AG-mut tunniussimasariaqaraluaat. Aamma allassimasutut konto pingaarnermi 10.06.24-mi missingersuutit immikkoortiternerat ima erseqqitsigisumik oqaasertalersugaanngilaq qularutigineqarsinnaajunnaarluni, taamaattumillu Naalakkersuisut tapiissutit tunniunneqannginnissaannik aalajangernerata maleruagassanut naapertuunnera tunngavissat pigineqartut tunngavigalugit mattunneqarsinnaanngilaq."*

Uparuagassartaali uaniippoq, Naalakkersuisut Aningaasaqarnermut ataatsimiititaliamut saaffiginnissimangimmata, pisap qanoq paasineqarnissaanik toqqarneqartup Inatsisartunit isumaqatigineqarnissaa qulakkeerniarlugu. Ilisimavarpummi Inatsisartut tassaammat Naalakkersuisunut sulisitsisut, tamannalu ataqqineqartariaqarsimagaluarpoq taamani, ilinniartifigalugulu siunissami tamanna eqqaamaneqartariaqartutut Inuit Ataqtigiiinniit isigaarput. Aningaasanut inatsimmi oqaasertaliuinneqarsimasut kikkunnit tamanit naatsersuutigineqarsinnaasariaqarput.

Akilerartarnermut aqutsisoqarfik atunngitsuugaqarsimavoq 3.7 mio .kr-nik. Inunninngooq piukkunnartunik pissaqannginnamik. Inuit amigaatigineqartut Ålborg-mi København-miluuniit nassaariarneqarput. Tamanna peruserineqartoq isumaqataaffiginngilarput. Taava tunniutiinnassaaguut? Taava immikkut ittumik iliuuseqartariaqassaagut, nunaqavissunillu ilinniartitsilluta. Qaquguluunnimmi akilerartarnermut Aqutsisoqarfeqartusaavugut! Kukkuersiuiernermut Ataatsimiititaliap pisaq, Aningaasaqarnermut ataatsimiititaliamut malugiaqquneqarnera Inuit Ataqtigiiit iluarisimaarparput. Inuttut pisinnaasagut atorluarnerunissaat ilinniartariaqarparput, ilisimavarpummi Aqutsisoqarfiup ataaniittoq, Akiliisitsiniartarfik ikippallaarlutik suleruluttut, aningaasat taakkununga atorsinnaassagaluarput.

Akiliisitsiniartartut tassaapput aningaasanik nunatta karsianut isaatitsisartut. Sipaarfigineqarlutik ingerlappaat? Sulisut pikkorissarneqartarpaat? Inuttai naammappaat? Apeqqutit taakku Naalakkersuisumit akineqarnissaat kissaatigaarput.

Taamatut oqaaseqarluta Nunatta naatsorsuutai akueraagut, kukkuersiuisullu toqqaqqunertut aamma akueralugit.